

四庫全書

史部

欽定四庫全書

欽定國子監志卷五十七

藝文二

應

制二

聖主臨雍頌

謹序

鄂爾泰

皇帝既藉千畝越三日

詔詣太學所以明教養相維用究道化也質明行釋

奠禮禮成

御彝倫堂進儒臣闡揚堯典及中庸首章之旨大哉
皇言確然示人易矣伏惟

皇上聖資天縱聖學淵懋緝熙光明統於一敬

天文丕煥作述兼該類皆摭寫性真昭宣道妙至是
親發德音甄陶譽髦蓋本夙夜宥密以覺世牖民觀
聽者萬數靡不中心誠服曠若發矇信乎君師

之極軌已

臣恭際

盛典睹穆穆於上明明於下於以導揚

聖德助流教化其何敢後爰忭舞而系之以頌伏候

採覽其辭曰

皇帝御寓疊聖重光秉冲思默惻惻星霜維時三祀格
祖垂裳總章

觀牧東田訓眡風宣緯序迺紀迺綱自天攸縱

帝謙未遑澄神宙始遐睎周行建官班政掌蠟詔王

仰惟

三后講德明堂宅京時又詔翼丕臧爰

命太史蠲日位常朕入太學覲於羹牆萬世之

師迪予用匡大昕行事其日少陽雨霽風止雲縵星

芒華蓋駐影列軼超躐龍樓早闢絳幄遙張旂

分柳色

輦過芹香樂陳武德斗運文昌羽林夾侍蟬冕相望

畫拱鬱起銀鋪略當據圖懸極徹瓦流黃藜耀

太乙壁散明璫宗彛儼雅

宸衷彷徨規重矩疊執玉捧璋既陳犧象迭奏筦簫
金絲繹繹枸蒺趙趙

天顏有穆哲嗣來慶奠楹屏惕入室濟蹌禮備物志
詔幸膠庠國老胄子東序西房三雍跨漢六館邁唐
乃藉綈几載啟青箱更端問難秉尺裁量講壇
鼓鐸道岸梯航橋門擁聽

玉振荀鱗性發孔蘊欽聞堯章曰中曰敬盛德詡揚
功參元造心納八荒永思金鑑時啟縹囊六經

日月百氏粃糠登山走岱觀水滙滄

王在在鑄嘉言孔彰汰華選實擷秀滋芳環中騰躍
露下清凜乾端坤倪魚泳禽翔

天眷彌極青祇効祥烟籠柏翠羲停晷長神懽人聚軼
景凌蒼匪惟鳴鶴叶彼翹凰匪惟遜敏緝熙就
將宮廟臨保雅頌成康吉士藹藹教澤洋洋維
道尊

聖維

聖翼

皇億萬斯載立極無彊竊比吉甫頌以言颺

聖主臨雍禮成頌

謹序

福敏

臣聞至治之世必重親師大化之行端由教學

於論於樂著美聲詩上丁仲丁具詳禮制顧道

統自羲軒而後至

孔子而集厥大成亦尊崇由漢唐以來惟

本朝乃極其明備盖先聖賴

後聖而益顯

君道因師道而彌光也欽惟我

皇上德由天縱學懋敏求內聖外王直扶尼山之蘊
上律下襲遙承泗水之宗既默契其心傳亦躬
行其要道猶且

親揮翰墨銀鈎表天地之功

整飭殿廷黃瓦煥雲霞之色夙哉尚矣蔑以加焉乃
帝德逾光宸衷倍切先庚釋菜既勤

清蹕以躬行大昕鼓徵復考鴻章而歲事時則歲行
當午沐教已逮於三年月令季春合樂宜諏於
初吉冷風載道方旋軫於天田朱旭啟晨事陳
儀於日馭華鐘徐動

玉輅遙臨翼翼生徒迎

鸞廣術躋躋法從弭節樞星

皇上乃歷東階修北面展牲獻帛儼珠庭日角之式
憑秉籥升歌恍玉振金聲之在列苾芬既薦墳

籍斯陳爰

御經緯宏敷講席中和位育探性道之淵微恭讓欽

明仰文思之光被精研奧義

親示

睿裁瞻近

龍顏如躬際帝廷之颺拜恭聆

天語共率循聖域之階梯隨

輦千官慶升堂而就日園橋多士班夾陛以如雲親

肅肅之盛儀沛洋洋之

德意

殊恩覃布樂育推

先聖之心曠典頻霑垂裕徧羣賢之裔信二帝三
王之德體全備於

一人歷千秋百世而遙疇絜隆於

今日

臣

恭逢

盛事不揣蕪陋謹拜手稽首獻頌曰皇哉

聖皇膺圖御宇聖敬日躋左規右矩雨布雲浮德洋

恩溥薄海光天式歌且舞

一章

乃稽聖籍於赫三宮合衆興德實先辟雍乃諏
吉日乃考鼓鐘大昕是徵

先聖是宗

二章

龍旂載揚鸞車載行制侔

宸居數仞宮牆停鸞矩步入室升堂仰瞻

天表穆穆皇皇

三章

杙欷笙鏞邊銅簋簋盛服齊明禮班弟子如見
羹牆如親杖几重道尊

師振古莫比

四章

蕭光既升雅歌既陳

天臨講座咨爾儒臣敷論性道發故啟新稽古有訓

示我通津

五章

濟濟諸生僉僉胄子外薄四海雕題鑿齒皇極

敷言準平車指大哉文明蒸我髦士

六章

維

帝之德與兩大通維

帝之心與千聖同恢張至教丕振儒風無思不服南

北西東

七章

大教覃敷淳風布濩蕩蕩平平遵我

王度鳳翽麟遊卿雲甘露億萬斯年受天之祐

八章

聖主臨雍禮成頌

謹序

張廷玉

欽惟我

皇上以天亶之姿懋日新之學興道致治文教覃敷
東西朔南罔不暨訖乾隆三年春三月甲寅
躬行視學之典釋奠於

先師先日致齋百禮咸秩大昕鼓衆環集于橋門
皇帝整法駕從百官言

詣辟雍自大成門

降輦而入

升階就位儼恪有加奠獻既行乃

御彝倫堂

命儒臣進講經書

王言昭示廣大精微自王公卿尹以及六館生徒四

氏十哲子孫環列拱聽莫不愉懌鼓舞思自振

勵以近

天子之光而沐

聖人之教煌煌盛典千載一時臣謹案記云古者建

國君民教學為先言人君致治之本必由於學

也書云學古入官議事以制言人臣輔治之術
必由於學也故說命之辭曰念終始典于學又
曰學于古訓乃有獲

孔子生知之聖不廢敏求用能兼綜百王師表萬
世我

皇上聰明睿知文武聖神薄海内外無不知

聖天子道德高深超越隆古而

臣叨被

殊遇日侍

禁廷當深宮毓德之年即已備員講讀親睹我

皇上懋勉功深基命宥密敬體

世宗憲皇帝明理立誠之實訓敦行不怠日就月將以
徇齊敦敏之質而宥密單心有非承學之士所
能及其萬一者是以

御極以來敷政寧民無非本天德而行王道作君作
師一以貫之實有以接洙泗之心傳而臻二帝
三王之治茲當

臨雍釋菜大典丕昭臣幸得親隨灌獻之末恭承

聖誨用敢質言所見作為歌詩紀述美盛非徒襲揚

圬之具文實將以昭式多士流示無窮臣不勝

踴躍懼忤之至謹拜手稽首而獻頌曰惟

皇敬學表正自躬文思光被化理聿隆風教之本厥

由性功緬企

先師心源則同

其一

至矣

素王規天矩地受命端門斯文是寄

列聖相承欽崇弗替

帝德重光禮明樂備

其二

我我廟貌翬革聿新

宸翰高懸輝映星辰肅將祀事維莫之春

鸞旂戾止言

詣成均

其三

鸞旂央央戟門斯啟拜獻

登階特牢備禮有睟其容有秩其禮百爾趨蹌師師

濟濟

其四

祀事既備乃開講筵

聖謨洋洋如日麗天

詔爾儒臣是究是研俾爾庶士是陶是甄

其五

皇帝曰都後先一揆入聖之階如塗如軌講學敷行

適觀厥美凡此秀民咸喻朕旨

其六

亶亶吾

皇繼天立極位育其功欽明其德成性存存小心翼

翼發為

訓辭為萬古式

其七

太和翔洽賢俊彙升薪之楨之髦士用烝文治

亶敷隆隆其興億萬斯年百祿是承

其八

聖主臨雍禮成頌

謹序

方苞

蓋聞

孔子為萬世帝王師以能開萬世之屯蒙而道濟

天下也自秦以後一姓代興規模草創必先尊禮
至聖以繫天下之心繼世賢君莫不臨雍講學
憲老乞言蓋天下之民知

孔子之道伸則萬事皆得其理而太平之澤將目
見而身被之也臣竊惟尊禮

至聖之實在信其言而行其道

孔子所以告君者具在中庸問政之篇我

皇上御極以來修德體道於九經之宏綱要旨無一

不實踐焉故能以浹歲之間使四海蒸黎慕義
懷仁之心勃然而興起蓋由

聖資敦敏好古典學幾二十年於

孔子之道求之切而信之深故本於

皇躬達於政教者如是其誠且篤也用此質諸

先師實在天之靈所深嘉而厚望者豈特大昕鼓

徵為園橋所觀聽哉乾隆三年季春朔後一日

皇帝躬詣太學釋奠禮成親講中庸之首章堯典之

首節蓋自邃古以來盡性命之理建中和之極
行於當時而位天地育萬物者功莫盛於堯垂
於萬世而明大道彰至教者德莫盛於

孔子是乃我

皇上夙心所祈嚮自志學之初以及

御天之日戒慎奉持惟恐有須臾之離用以上格天
心而下通民志者故嘉與天下臣民會歸於有
極也茲與

孔子所傳體達德致達道以行九經而一本於誠者實相表裏臣伏念臨雍之禮舊史所書典文俱備詞人所述體制各殊炳炳乎無以尚矣臣學蕪年老語不能文謹據所見敷陳質言特著其信而有徵者頌曰

昔在

孔子賢於堯舜匪德能優惟功之盛堯仁如天一世之幸尼山木鐸千秋金鏡

天祐下民我

皇篤生

夫子之道逮我

皇而大亨至仁肫肫學與性成秉持六經踐以

躬行智以成仁善繼善述大孝之光治殊道一仁以

生勇心純事實以道成身久而不失敬禮師傳

收恤耆儒一言片善來納無虛若逢顏孟次或

程朱尊德樂道當更何如敦叙懿親德心普被

盪滌宿愆坦然無忌羣公三事凡百有位推誠
備禮豈惟祿賜惠保蒸黎予寒予飢憂民如疾
愛之如私德以撫順信以招攜窮荒僻徼覆幬
無遺九經三德

先師所傳我

皇得之時乘御天

先師有志

皇寶成焉以考以質宜無間然月吉辰良

皇親釋奠惟秉德馨肅將嘉薦

先聖之揆

後聖時憲精意所通羹牆如見

聖言深闕教思孔誠四表上下格以欽明中和之致
位育之徵原於性命戒懼所成庶官庶士敬而
聽之惟

皇之極即自得師是訓是行

先師鑒茲勉為貞臣毋負

昌期

聖主臨雍禮成頌

謹序

陳大受

皇帝誕膺景命統臨萬國作之君師以為民極

御宇之三年既擇元辰藉於千畝其三月二日乃詣

辟雍以表彛倫宣教化皇哉甚盛典也

臣

竊惟

至聖之道光昭宇宙內聖外王渾全純備依古以
來所為一道德同風俗措天下於蕩平正直之
歸者胥由乎此我

國家

列聖相承右文敷教超軼千古

皇上以天縱之資懋修典學闡洙泗之淵源紹尼山之統緒先聖後聖契若合符前年既頒

特旨增修

文廟易蓋黃瓦今春上丁展祀備舉三獻之禮復親灑宸翰昭揭

大成殿用示欽崇令典隆儀有加無已乃者大昕鼓徵

躬釋奠於

先師俾儒臣進講中庸堯典

聖訓精詳

天恩高厚所以嘉惠多士者甚至自王公卿尹聖裔

賢嗣垂紳裁弁之儒期門羽林之士莫不鼓舞

懽忭仰見

皇上崇儒重道廣勵學官而益以知道洽政治之原

也臣聞古者建國君民教學為先唐虞上庠下

庠之規直溫剛簡之訓載在遺編亦越姬周鼓
鐘辟雍訖乃聲教時則成人有德小子有造其
極至於東西南北無思不服蓋聖天子道積厥
躬而作人之效如是其遠且大也我

皇上備欽明恭遜之德握性天道教之原既以聖人
之修己者本諸身即以聖人之教人者廣諸世故自
臨御以來恩普德洋教行化洽山陬海澨淪浹靡遺
天下之士將必有懷德秉義近文章砥廉隅以

光輔太平者蓋陶淑人才即所以茂登上理豈
僅如史冊所傳園橋之衆三舍之規循故事美
觀聽而已哉臣幸際

聖明不勝踴躍歡欣之至謹拜手稽首而獻頌曰

天亶

聖哲扶樹人綱金聲玉振性道文章孰窺美富數
仞宮牆百王繼武俎豆芬芳繫惟

聖主誕敷文德於月之蝓於日之域緬茲典型遵乎

憲則璧沼園流萬邦矜式闕宮業業黃屋是崇
宸章炳煥騫若蚪龍與天地參樞機化工下蟠上際
道妙允充風氣之開

神京伊始霞蔚雲蒸蟬聯鵲起濟濟儒生佻佻胄
子近

天子光訓行惟是華鐘既鏗鼉鼓斯響

天步肅臨寰瀛欽仰元纁以薦太牢以享禮成樂備德
音載廣有堂巽熊人倫攸叙烝我髦士亦集爰處

皇帝曰俞式聞

聖語宏教宣風基於庠序民有秉彜本乎天命道立
教行生安謂聖欽明文思平章百姓放勲重華
後先輝映巍然隆範欽哉

訓辭

一人作則為萬世師既富方穀
躬實導之同文共軌六合雍熙

聖主臨雍禮成恭紀

謹序

蔣溥

臣聞建國君民教學為先虞夏殷周以來膠庠
既備典制聿詳至於大昕視學於樂辟廱詩禮
之舊聞尤盛事也仰惟

孔子立師表之極擅參贊之功累代尊崇加以隆
禮然而禮不虛行必有其合惟王者躬有聖德
直契心源於是制作休明舉行曠典使天下嚮
風而慕義則惟

聖朝為極盛我

皇上承乾御宇錫類推恩大孝格於高穹至仁周於
薄海加以

聖學宏深亶聽天縱所著樂善堂全集日知薈說二
書海涵地負茹古納今乃以

君師之合統昭先後聖之同符稽典方新即修

視學之禮釋奠既畢講席斯開合萬國之生儒親

一人之提訓煌煌乎郁郁乎洵所謂被堯文光舜孝

軼周雍而邁魯津者矣臣職叨侍從珥筆

禁林不揣奔陋恭紀詩篇以誌訓行近光之慕不
徒敷揚美盛云

鑒輿曉度傍樞星統合

君師式典型萬仞宮牆輝釋奠九天雲日照橫經先

登道坼尊

前聖獨契心源示在廷樂備禮明

恩浩蕩春流芹藻有餘馨

其一

坦坦賢街接禮門升堂展敬

帝容溫虬松舞翠枝逾古駕瓦流黃制倍尊物備兩
楹車服盛爵陳三獻禮儀敦無言自有羹牆契

北面親

師對越存

其二

鸞旂翠葆映霄雯午夜生徒佇大昕香靄氤氲披

御座霞光燦爛仰

天文敷揚性命傳洙泗尚論欽明重典墳名理會心

期共喻園橋冠帶蔚如雲

其三

聖朝文治洽膠庠更企

宸修卜運昌三殿瑤籤垂制作六堂寶架煥文章淵

源早識傳心法俎豆重看發道光今日講帷沾

教澤無私化雨遍遐方

其四

聖主臨雍禮成恭紀

謹序

張若靄

欽惟

聖天子功隆位育統備君師先知覺為聖人宜聰明
作元后大猷格被覩誠民阜物之能文命覃敷

昭緯地經天之業乾行不息日進無疆於緝熙
單厥心念終始典於學丹書綠字每陳往訓于
湯盤縹帙青緗時考遺文於孔壁

宸章璀璨彩爛雲霞

御集琳琅光昭日月先萬方而表則統六合以同文
念京師為首善之區太學實儲材之藪鼓鐘羽
籥道備三雍禮樂詩書教崇四術將化民而成
俗必釋奠以親

師

特勅禮臣載新

文廟雕甍翼翼鋪來一色泥金文瓦鱗鱗望去千
重赤赭爰諏吉日肇舉隆儀嚴先事之致齋定
從臣之陪列朱旗繪日仗列螭坳黼幄連雲班
分豹尾候鯨鐘之初動晨霞偕璧彩齊輝瞻鳳
蓋之遙飛瑞靄與奎光並煥千官扈蹕爰來習
禮之宮六館懽迎共侍成賢之里望星門而

降輦臨大次以更衣拾級

升階

登堂就位輝煌燎炬近接文光馥郁爐烟遙通道氣
夏瑚周簋覩法物之駢羅舜瑟軒琴聽韶音之
迭奏舞成八佾歌備三終圭瓚方陳特下

冕旒之拜衣冠畢集咸勤紱舄之趨對越維誠焄蒿
畢達乃陳

法駕言

泣黷宮開

御幄於鱣堂進瑤編於鶴案遡欽明之統緒直契心

源探性命之精微宏宣道蘊

王言丕著如聞聲振之音

帝語親傳恍發疇圖之秘褒衣博帶犀膽有道之

天顏鼓篋橫經共沐無私之

聖化爰

碩寶訓疊

降綸言恩榮遍及於臣隣宴賚尤加於聖裔濟濟鴻
都之彥聞

鳳詔而傾心雍雍虎觀之嚮向

龍墀而拜手儒林誌喜藝圃沾榮臣學愧面牆心希

入室夙典文章之事稱職為難欣依侍從之班
觀光是幸敬呈歌詠式效對揚

聖德修而萬民化知四海之從風師道立而善人多
見八方之歸極詩曰

黃幄新開萬仞崇

鑒輿視學出齋宮祇因百代心源合愈覺三雍典制
隆鳳幄翠分庭栢影鸞旂香滿沼芹風青袍道
左爭迎拜一體

君

師教育同

其一

爐烟漠漠靄彤墀

翔步升堂盥獻時已向兩楹陳俎豆如聞四壁應金絲

留連車服看猶昔對越羹牆儼在茲紅燎光中

親展禮

天顏肅穆侍臣知

其二

合樂聲終扇影迴儒臣先侍講堂來繡袍黃繖

從天下綈几牙籤對

御開共覩欽明光格被久知位育道全該尼山宗法

唐虞治並列瑤編仰

睿裁

其三

銅街簇仗駕飛黃

仙蹕才移晝漏長萬國共欣瞻

鳳藻諸生新得覲

龍光統開八百車書會人在三千弟子行遙見金根

隨化雨殿槐壇杏一時芳

其一

聖主臨雍禮成恭紀

尹繼善

章天雲漢燦奎光門啟樞星俎豆香夾道松陰

新鬱翠重簷駕瓦煥離黃

其一

纔見明裡格上丁更諏吉旦薦惟馨禮修釋奠

虔三獻教在親師闡六經

其二

嘖嘖鏘鳴建羽儀

翠旂迎處見恬熙欣傳

聖道昌明日正是光華格被時

其三

宸章絢爛麗銀鈎贊化功能洵莫儔不是

心源相契合焉知天地與同流

其四

無言鹽獻達精誠玉豆雕籩設兩楹大樂從知

臻善美始終條理太和聲

其五

數仞宮牆入望中教垂萬世仰崇隆欲觀美富

門難得

特許儒臣助祭同

其六

黼座親繙玉笈開一時雲物睹昭回

睿思包盡圖書秘不藉崆峒訪道來

其七

駿奔執豆荷

恩榮濟濟雲初取次行

錫賚有加跼往制懽聲傳遍魯諸生

其八

聖主臨雍禮成頌

謹序

汪由敦

欽惟我

皇上神明天縱聖敬日躋煥乎文章光被四表海內
承學之士延頸企踵喁喁向風文治彰明曼哉

尚矣猶

念太學為賢才之闢教化所自粵乾隆三年春三月

躬釋奠於

先師禮成

御彞倫堂儒臣進講

皇上親渙玉音闡明大義維時公卿侍從之臣以及
聖賢胄裔太學生徒環侍竦聽者凡數千人咸
得仰瞻

天表親被

道德之光華郁郁乎煌煌乎前史所云辨折異同正
坐自講章句質疑稱制臨決方斯蔑如矣

臣竊

惟太學之制肇於有虞盛於成周而大備於

昭代我

列祖化成人道壽考作人教澤涵濡至深且厚而我

皇上躬聖人之德明聖人之道修聖人之教舉有造

有德之士鼓舞而作新之在詩大雅曰古之人

無斃譽髦斯士而其頌文王也曰於論鼓鐘於

樂辟廡其頌武王則又曰鎬京辟廡蓋周先王

之德澤相繼以長而於辟雍教學之地復加之

意如此棧樸作人卷阿多士德化之成其所由
來若斯之遠也且夫兢兢日行其道舜業業
日致其孝古聖人德加四海未嘗不由於身教我
皇上緝熙光明終始典學義軒以來之統

孔子所謂集大成者既迪知之復允蹈之蘊之為
盛德施之為大業純亦不已道積於

聖躬教思無窮烝我髦士於是恢

熙朝之隆緒修虞庠之上儀

德意龐鴻

恩施溥博傳曰天子建中和之極金聲而玉振之昭

景燦揚洪休邈考曩編實惟

今日

臣

幸覩斯盛敬隨諸臣之後作為頌歌拜手

稽首以獻其詞曰

天佑下民若有恒性克綏厥猷惟

后作聖亶亶

聖王顧謨明命

聖德之純立誠居敬

一章

粵若

先師道德之宗昭揭日月覺悟羣蒙于羹于牆心

源相通有赫其儀式是辟雍

二章

於樂辟雍四方之極式擴舊章是崇是飾宮牆
翼如黃中正色軒楹煥如榜題

御墨

三章

仲月上丁灌獻既親載稽令典載卜良辰載泣

橋門俎豆莘莘服膺至道執禮斯頻

四章

秩秩講筵煌煌大義探本天道稽古帝治位育

中和欽明文思我

皇有之後先一致

五章

至教彰矣至道光矣濟濟多士示周行矣覃被

四海澤無疆矣勉勉我

皇文德翔矣

六章

於燦

列祖德洽九宇倬彼雲漢萬物斯覩煦之和氣膏之甘

雨觀文化成超軼隆古

七章

隆古之治我

皇承之蹈德咏仁髦士攸宜

身示之教從欲以治於萬斯年作君作師

八章

聖主臨雍禮成頌

謹序

趙大鯨

欽惟

皇上膺圖御宇協和萬邦教化覃敷懋致文明之治

紹承

列聖心法敬事

先師孔子

特命大成殿易蓋黃瓦

親灑宸翰表揚至德乾隆三年二月上丁既

躬親釋奠復於季春行

視學禮展祀

先師肅將三獻乃

御彞倫堂

命儒臣進講中庸虞書

皇上宣玉音析道要一時王公卿尹侍從之臣聖裔
賢孫暨肄業成均之士環橋門而觀聽者四千
有餘人咸仰

聖天子重道崇儒鼓舞譽髦之至意莫不感激奮興

頌揚盛典

臣

惟上天陰臨下民若有恒性必作

之君師治而教之俾復其性要其治之道惟

本乎人主之一心虞書頌放勳之德首言欽明
中庸詳中和位育之功由於戒懼慎獨惟能夙
夜宥密以單厥心始能盡其性以盡人之性也
夫堯舜禹湯文武之道集大成於

孔子

孔子之道與天地參不因時運為隆替而惟尊其
道者乃有以致太平之治我

皇上天亶聰明功深典學於

孔子之道聖性得之加聖功焉嘿契於心而推之
以治天下使君子得聞大道之要小人得蒙至
治之澤天下皆在光華格被之中各率其性之
本然而不自知用使道德一風俗同承累洽重
熙之運以洪億萬年丕丕基其由是道歟臣謹
拜手稽首獻頌曰

聖皇建極統先億兆示周行兮右文稽古尊崇
聖道切羹牆兮諏日具儀釋菜行禮鉅典光兮圭

幣肅陳金絲迭奏凜對越兮以

聖契

聖精誠孚合儼昭格兮大昕警衆敷陳奧義

親講席兮思樂泮水於論鼓鐘小大從兮

恩覃樂育賢關廣闢首辟雍兮溥天率土文命誕敷

暢淳風兮中和合德金和玉節宏綱紀兮文思

廣運

天章炳煥昭光被兮鼓篋孫業觀摩陶淑洙至治兮

紹述

先猷觀光揚烈接心傳兮

宸修懋勤

聖敬日躋惕乾乾兮人文化成誕膺

寶命萬斯年兮

聖主臨雍禮成賦

嵇璜

維我

皇之建極當九五之鴻禧齊文章於七曜等制作於

兩儀包君師之統緒涵道妙之淵微其闡揚夫
聖德者鳳翥鸞翔之額也其默契於

宸衷者素符玉冊之辭也猶

念瞽宗有制釋奠有規考園橋於史冊追頻壁於雅

詩必

躬臨夫太學而祇見夫

先師於是吉日維占隆儀式備雲輅鳴鑾春旗揚

旆金根照灼以炯晃龍馭騰驤而沛艾太乙執

節以先驅虹霓修竿而繁會晞陽交映於寰中
灝氣震越乎區外初雷動以星馳既淵渟而嶽
萃萬國之冠紱來同九天之神明翼衛蓋秀髦
之迎百辟之俟者莫不翹首而瞻

天趨蹌而就位也是時

天子粹然玉潤穆然天運望宮牆以致欽循孺星而
徐進既升堂而入室與

素王而相覲乃擊鼉鼓鏗鯨鐘建樹羽發笙鏞千

燎具舉萬炬畢融宿懸堦下振樂庭中八佾舞
朝華之鏡九歌揚閭闔之風寶鼎轉祥烟之鬱
律玉卮凝甘露之殷濃明裡昭格瞻拜從容志
和氣肅德盛禮恭信乎三爵特獻萬瓦流黃始
足以表其崇隆也爾乃啟絳幄登講堂張檢牒
發縹緗金泥洩祕石鼓騰光位育中和首參性
命欽明文思直接陶唐共識聖功之浩浩遙聞
天語之洋洋已進儒臣之奏還抒心得之章闡苞符

於窈眇析柢蘊於微茫聚金玉於

綸綍麗日月於中央蓋上以繼三古之道法而下以

開萬代之津梁於是典禮告成

鸞輿返蹕

九重之慶惠齊頌四海之恩榮並錫褒賢推及乎雲
初享祀維馨其黍稷或博士之增置或神田之
增設與聖證其心與賢敷其澤為民復其性為
士興其德既皇皇喬喬海運而天聲復倭倭遲

遲風和而露溢紫微下屬於橋門勾陳錯施於
園壁三才容與於元胎萬象環拱夫皇極協氣
上布祥雲下積音為樂和形為人悅雕題鑿齒
額首而來賓赤鳳白麟應奏而舞節猗歟曠世
之鴻典

大聖之盛業宣漢唐令辟所能彷彿其萬一也哉

臣

性道初聞精微若揭祇切訓行敢忘揚扆頌曰

太素氤氲兆龐鴻兮

先聖立極並蒼穹兮穆穆我

后道揆同兮祀事孔明精誠通兮宏開講幄發羣蒙

兮爾卿爾士盡孝忠兮敷文四國教術崇兮

景運萬年昭淳風兮

欽定國子監志卷五十七

欽定四庫全書

史部

欽定國子監志卷五十八

詳校官國子監司業臣納麟寶

編修臣程嘉謨覆勘

總校官檢討臣何思鈞

校對官主事臣陳文柞

謄錄監生臣許溶

欽定四庫全書

欽定國子監志卷五十八

藝文二

應

制三

聖主臨雍禮成恭紀

于枋

列聖尊師崇典禮我

皇重道啓文明

鸞輿遙駐先猷渥駕瓦新加廟貌嶸嶸遠溯隆規從

闕里

特敷曠典自神京地當首善風聲近壁應中園氣象

宏

詔勅司空勤樸斲帑

頌內府備經營黃雲遍布連天峻金掌平鋪映日晶

殿上琉璃光錯落池中芹藻影縱橫

素王宮竝

宸居麗風伯塵從輦道清三月春光當上巳十行

溫語布先庚德參天地超千古道協君師集大成珠
榜雙懸輝鳳翥璇題迴揭耀鯨鏗扇移雉尾雲
中出樂奏中天仗外鳴班列趨蹌多聖裔道傍
瞻拜有諸生九衢鵠立聽傳箭五夜雞人早報
更闌闔初看陳玉輅官牆已見蒞青旌禮虔登
薦殷三獻道契精微貫一誠殿廡乍傳嚴祀享
橋門恰喜纛簪纓青衿爭識

天顏近縹帙齊繡講席盈天命源流研似髮放勲事
業見於羹理從無極推尋細德本生安剖析精
更聽

王言宣妙蘊共嘗

君賜愜羣情裏封黃帕煩中使餅餌紅綾比大烹砥
礪生徒先器識選升俊造廣科名

聖明繼述光前史不數貞觀暨永平

聖主臨雍禮成恭紀

汪士鋐

御宇綏猷撫萬方風行首義

莅官牆

經筵早探文章府壁水新隆禮樂場甫歷疆原

躬耒耜更期絃誦集膠庠稽疑卜吉

洛宗伯奠幣鳴球

詔太常湛露桐花迎

仗發春深芹葉薦筵芳

鸞旂映翠臨東序

雲罕搖青出建章門闢櫺星金碧煥庭陳石鼓鼎彝
光

天書璀璨

題銀榜殿瓦琉璃照畫廊俎豆明馨

誠意格笙歌備奏

德容彰三階登降瞻

龍袞兩翼簪紳儼雁行黛柏連雲祥靄護

皇輿載道惠風揚莘莘國子隨

仙蹕濟濟儒林侍講堂
絳綵巾裾循律度
歲筵劍珮
謹趨滄雲屯鱗萃
班初定星共辰居

幄正張

御几平移丹地近
琅函旋展綠綈裝
微文闡發霞敷
采大義宣昭斗耀芒
研討千秋傳玉檢
譚論六藝啟珠囊
諄諄

帝訓敷言遠赫赫

皇謨施教詳性道
淵源符往哲
勲猷格被駕
前王瞽

宗

惇祀幽光表

側席旁求俊乂翔庶彙

甄陶歸典則姱修

調燮協柔剛圜橋觀聽槐街合夾道歡呼

羽葆颺多士依依魚在藻羣英翩翩鳳鳴岡欣逢

盛典錡鐘鼓文物昭回

泰運昌

聖主臨雍禮成恭紀

孫灝

敷天聲教際崇文

視學昌期準大昕膠序典追三代遠咸韶音向九成

聞春旗日暖排仙仗

寶幄香霏護紫雲觀聽橋門齊拜慶

翠華翹首瑞氤氲

其一

丹楯翬飛釋奠新

宮牆美富百無倫參天道與星辰炳肅

廟

躬將禮樂陳

袞冕齊瞻森六館
豆籩重薦接三旬
心源直溯尼

山峻裡祀馨香格有神

其二

壁沼春深翠荇長
鵷鸞夾道迓

龍光九天

奎藻輝東序五色

綸章賁上庠

玉案乍飄香
晝靄牙籤徐拂軸
琳瑯

垂衣邳治崇儒術

聖學千秋頌就將

具三

槐階上舍居聯席
虎觀諸儒聚析疑
思近

聖人聞性道生逢

元后作君師
青衿

賚溥垂

宸眷

紫綉宣稠煥盛儀文物周京豐鎬舊辟雍鼉鼓被

聲詩

其四

聖主臨雍禮成恭紀

于敏中

振興治化重師儒

前烈昭垂禮更殊

駕幸尼防傳盛典

勅新殿廡擬皇都

兩朝宸翰天文煥五代王封神意享今日

聖明光繼述先從首善肇鴻模

其一

於論鐘鼓盛皐皐

詔以三年辛講堂預勅冬官勤樸斲還同闕里煥宮

牆橋門池沼連天碧殿上琉璃映日黃恰喜功

成當釋菜青旂早已出明光

其二

風和春仲上丁時

萬乘初行三獻儀禮器輝煌陳俎豆

宸章璀璨護雲螭德參天地功同撰道繼勲華統作

師纔聽九成天外奏圜橋又見飭諸司

其三

聖主垂裳教養新東郊耕後蒞成均天田好雨真如
露壁水和風正及春黃幄殿頭輝彩壁青袍道

左傍簪紳諸家博士兼言再觀禮新恩覲

紫宸

其四

穀雨欣當上巳前龍旂豹尾擁爐烟

九重天上難彞肅百辟班中虎拜虔底用芹香歌魯

頌漫將石鼓紀周宣

盛朝典禮輝千載冠蓋紛迎弟子員

其五

祀事初成瑞氣開

鑾輿早向講帷來縹緗珍重東西列聖裔從容次第

陪槐蔭兩行沾化雨梨香一片淨纖埃雍雍學

舍瞻

天處甲乙諸科領茂才

其六

道隆堯舜洎尼山斷自唐虞始不刪率性欽明

原共貫放勲位育本相關儒臣進講昭彞典

天語丕宣振懦頑觀聽一時沾雅化紅綾餅餌特分

頌

其七

到處儒生忭舞聲文宣後裔樂陶成郎官光應

星辰燦州牧恩兼金紫榮藻耀黌宮添鼓篋華

開鹿野廣吹笙

微臣

珥筆叨佳宴竊附風謠紀

太平

其八

聖主臨雍禮成恭紀

齊召南

顯謨承烈際重熙

聖主端居講藝時
禮樂百年光舊典
文明千載啟

昌期心源自與唐
虞接道脉遙從洙
泗垂視學季春

依月令於論鐘鼓
譜歌詩

其一

詔下冬官庀桂梁
功成不日待

登堂櫺星彩煥幾
重戟壁水光新數
仞牆矗漢千霄

我冊府蟠龍翥鳳
麗

天章眼眉駕樣琉
璃瓦并與

宮雲一片黃

其二

虎闌燈燭集儒官聲報靈鼉夜色寒博士四門
齊鼓篋諸生六館盡彈冠濃濃露待霑槐市縵
縵雲先護杏壇漏刻漸催天半曙分班鵠立候

鳴鸞

具三

太平

天子泣芹宮夾道旌旗映日紅正是芳時逢穀雨共
欣

清蹕引薰風典文稽古三雍備

家法尊

師六拜崇不盡高山瞻仰意

精裡直自比升中

具四

彝倫堂繞

玉爐烟論說司成

賜坐氈占得

飛龍乾五位肆來鳴鹿雅三篇賓興更展春官額俊
造同分太府錢率海譽髦觀

盛德

恩波還勝永平年

其五

衣冠萬國萃圜橋化日光天觀

聖朝侍子早聞來百濟舞干端已格三苗期門脫劍

通經盛絕域銷烽受節遙試望泮林棲錦翼好

音俱學鳳皇調

其六

聖主臨雍禮成歌辭

謹序

張鵬翀

天子藉于天田又三日有事於辟雍

玉輅親臨羣工祗肅維時太學橫經絃誦之士三千
餘人咸得拜迎道左仰瞻

聖天子穆穆之容踴躍下風欽承

至教我

皇上續成丕緒正當百年禮樂之期德盛化神婉隆

三五

天章炳煥與舊六為七釋奠講學崇儒重道千載一

時小臣備員侍從幸獲躬逢

聖期沾被

猗賜欣忭感激輒形歌咏詞義淺陋愧列承明制作
之林竊希附日月之末光揚懿美於萬一其辭

曰

聖王躬詣太學尊師典禮攸崇夙夜心傳宥密旦明
契合昭融六經與天無極大道如日正中

講筵大昕警衆觀聽曠若發蒙

其一

伊古教為治本興朝建學親師有熊成均是基

虞氏米廩昭垂成周制兼四代三雍典備上儀
我

皇憲章祖述顯爍用光前規

其二

三月晨昕暉麗和風初動鳴鑾

天子尊師北面相儀祇肅千官上公紱組陪祀多士

蹌濟我冠降輦

天容穆穆園橋衆庶騰歡

其三

黃屋

宸居竝麗翠華

法駕親臨車服兩階粲列金絲九奏揚音三獻上丁

載肅五雲太甲蕭森幸備

明廷侍從

聖涯涵泳泓深

其四

禮既成兮樂備儒臣趨侍執經墳典披陳治要

性天剖析流形

聖學浩如河海

綸言炳若日星宛同制作定世早符五老降庭

其五

列祖德輝廣被我

皇道岸先登六藝折衷有素五經纂述相仍文教譽
髦無數賢關連茹同升濟濟三千拜舞仰瞻丕

顯丕承

其六

陟降崇階殿阿俯省樂育菁莪槐市街連玉軫
成賢里接鳴珂峻德婉隆三古元氣鼓盪太和
慶成

鑾輿弭節穰穰降福孔多

其七

大矣

聖人臨御優優崇德尚賢王者仁期必世禮樂興在

百年稽古榮光焉奕

殊恩飲賜駢聯共際光天化日宛然風月無邊

其八

以上六言八章章八句

廟庭金爵鬱觚稜古柏森森霽凝遙見柘枝

親降輦櫺星門外日初升

其一

鸞旂乘曉拂春星先甲精禋接上丁陪祀千官皆

屏息

一人齋祓薦芳馨

其二

臨雍典禮爍重光聖裔賢孫肅祿將三獻上儀

仍翼翼兩階萬舞更洋洋

其三

祀事將成禮更殷齋心萬古接斯文兩楹夢奠

精英在福祿如天答

聖君

其四

黌宮肅列候

鑒與春氣融和化日舒六館諸生齊拜舞儒臣齋風

進經書

其五

尼山道脉

聖心傳講座微言徹性天功效自然符位育一時化

雨被三千

其六

平生誦讀企都俞愧乏賡揚繼典謨此日

欽明親聽覲信知身世是唐虞

其七

慶成

聖駕六龍飛多士榮沾飲賜歸近識

天顏知有喜

侍臣長得被恩輝

具八

以上七言八章章四句

聖主臨雍禮成頌

謹序

秦蕙田

皇上握符出治建極綏猷體剛健之乾行煥文明之
離照牖民覺世殫濬哲於生知稽古尊經懋緝
熙於典學

聖製昭乎象緯日麗星輝

道範契於羹牆金聲玉振黃瓦壯輦飛之宇制擬

闕廷璇題標

鳳翥之章光騰雲漢廣開膠序徧春弦夏誦之英

特賜瑤編示月窟天根之學學術總該乎四代俊髦

遠集乎九瀛道德一而風俗同聲教宣而彝倫

叙聿舉

臨雍之典祇行釋菜之儀翠華捧日以雲移法駕乘

春而電轉天香飄乎義路龍軫駐乎禮門睹興
升堂修筵飭几

皇心載肅祀事維虔雞彝與瓊斚交陳象管並金鏞
迭奏既禮成於

文廟遂

親蒞乎講筵紫案橫經闡三才之祗蘊縹囊啟鑰抉
萬彙之精華中和著位育之功欽明表聖神之
德笙簧六籍冠冕百王車服雍容備觀黼黻珩

璜之美宮牆巍煥恍聞金石絲竹之音轉陶冶
於鴻鈞作新有象運樞機於圓軸樂育無私化
雨旁流泮水蔚菁莪之色文風普扇珠林呈棧
樸之華廣賢裔之觀光數倍加乎五氏擴賓興
之解額澤覃被乎八紘洙泗增光章縫胥慶臣
身遊藝圃志切經畬丹地雲高仰

天文之炳耀芹池晝永欣

盛典之遭逢敬播頌聲異揚休烈謹拜手稽首以獻

詞曰

聖皇撫運如日正中化成光被德盛業崇惟三載春
親詣辟雍典宗百代輦馭六龍道由揆一
聖以天通度陳邁亘肅肅雖迺迺

臨講席旭旦矐矐談經論道綏厥降衷中庸戒懼堯
典欽恭會其有極允迪羣蒙圜橋觀聽億萬喁
喁袞濯興起勵志飭躬匪文伊實以篤淳風雅
頌之腴禮樂之容自南自北自西自東江河浸

潤洋溢豐融惟

帝廣運文思明聽作君作師聲施無窮

聖主臨雍禮成頌

謹序

劉綸

欽惟我

皇上右文稽古重道崇儒迺

御極之三年春既

躬詣太學行上丁釋奠禮三月癸丑朔越二日甲寅

遂

親率羣臣及國胄庶俊大合樂講經於

彝倫之堂所司以成禮告伏念我

國家化成久道累洽重熙

皇上統備君師以

聖契

聖定

素王之制崇

黃屋之規重以

睿藻喬皇表彰至道天地清泰日月昭回堯舜勲華
文武謨烈一以貫之先是二年冬

御製樂善堂全集成以學官請

特允頒賜俾廣牖迪凡預環橋鼓篋者蒸蒸喁喁陶
陶遂遂皆得進而頌

天子之高深學問焉茲當

大禮慶成都人士式霑

濃化允宜抒之觀聽被以絃歌謹拜手稽首而獻

頌曰翼翼橋門巍巍道存

大君之臨道立

師尊乃時惟大所有闡發鼓有習

鸞旂有翔

鷺羽櫺星曙開德風化雨言從之于邁于堂于廡

既登萬舞亦奏三終祝贊曰具儀昭哉有融羹

歟牆歟心印脉通遂周乎翼序自我西東有歲

聖宮式增式擴甃碧以黃塗丹于廡

講席在堂莞筵帝冕偉知覺之先千秋鐘鐸用闡性
府用宣道藏德明而峻勲被而光

一人鼎呂多士笙簧猗歟

宸翰為雲漢章猗歟

聖製為金玉相

帝曰俞哉自今以始奕爾上公蒸爾博士爾冠爾裳
五十其氏爾俎爾豆萬億其祀先民有乞言書
于傳史矧爾在泮載壬載林載赤其帑載青其

衿載

錫之命無俾爾弗任茵以黼純爰坐爰讌甌以金莖

爰酌爰薦曰廩之餽之樂此

畿甸曰茅之茹之惟德之徧以廣于德心以嗣于

德音小臣作頌以獻于

司箴

聖主臨雍禮成頌

謹序

杭世駿

皇帝御極之三年歲在著雍月維柔兆

詔有事於太學先期下所司各庀職以上考

國程秉經義用丕集於禮甚盛典也於是日官吉
蠲禮官具儀大胥簡徒司樂授器迺陳

法駕詣辟雍躬釋奠大臣陪位小臣就列六軍七校
既匡既肅禮成

上御彛倫堂進師儒等官敷闡經術生徒萬人圍橋
瞻企咸稽首願化仰奉

聖天子盛德作人至意臣謹按古學之制自五帝始

有虞夏商各建名義姬氏受錄兼用四學設教
之方於斯為備是以於論鼓鍾鎬京辟雍諸什
咸見採於詠歌宣於金石傳之一時千古雜誦
我

朝統一區夏大啟儒風文德錫極茂典有加

皇上以生知之質肇執中之傳典謨總於一心聲教
訖於四海

國有嘉禮次第舉行茲乃

親臨學宮修明大紀煌煌焉秩秩焉自古文治之隆
未有如

今日之盛者也

小臣幸際

昌期與觀明備敢以淺鄙妄擬穆如然自臣子近光
之願下士鳧藻之情誠有不容以已者謹獻頌
一篇頌曰

天生蒸民有物有則克綏惟后曰攸好德戢戢
有衆具羣千億翼翼秀良萃此

皇國國之所儲下土所謂禮容樂服稱是令譽若彼
良畝惟勤菑畬若彼純璞琢為珩琚珩琚鏘鏘
多士濟濟我

皇顧之嘉樂豈弟迺詔太常迺命司縈青陽之吉式
昭典禮典禮戒備司贊攸行物瑞雲炤神勰氣
昌玉振金聲而道大光

前聖

後聖合德一堂堂皇業業上棟下宇銀榜環林重檐

夾廡犧尊青黃冠裳黻黼樹羽宗牙象箭鼉鼓
列辟左右奉璋贊卣敷席振米有孚盈缶青烟
縈槐綠霧拂柳凡此羣材為薪為楨

帝有恩言如春斯暄

帝有恩植如卉斯蕃陳詩論藝勿告勿諉航浮沂泗
緒引義軒明明

列祖教澤孔淵

皇上善述野無伏賢儒風浹宇文思啟天百物熙皞

展唐虞年勗哉多士敬修厥詣或德而材或道而藝庶幾大成以承

帝筮小臣夫音用告世世

聖主臨雍禮成賦

董邦達

維乾隆之三載兮至治煥乎寰瀛昭緝熙之敬德兮發二氣之淳精紹心傳於千聖兮訖聲教於八紘然猶

念典學致純誠下

明詔樹風聲將

臨雍以訪道開六學而進儒生於時律吹姑洗日喜
載陽戟門槐綠壁水芹香乃新

廟貌丹雘煌煌乃灑

宸藻日麗星芒黃瓦晶瑩彩煥琉璃之色銀泥璀璨
勝開雲漢之光禮器斯陳備千秋之法物笙鏞
在列啟萬仞之宮牆

天子於是即齋宮乘玉輅羽衛屯雲爐烟凝霧望類

壁以前驅闕橋門而徐度多士集而趨鳧上公
戾而振鷺肅肅雍雍降

輦以步禮隆三獻中階瞻

龍袞之升序列千官陪位盡鷩鷩之數爾迺

一人穆穆萬舞洋洋神人胥悅志氣肅肅張樂奏九成
儼聽魯宮絲竹羽陳八佾如親泗水文章諒

前聖與

後聖默契合於一堂禮成而退

講幄高褰儀曹捧案祭酒趨筵芸編既設妙義斯宣
精研奧旨不落言詮性由天命道以教傳中和
是致戒慎維虔載稽古帝齊聖廣淵恭安實備
光被無邊一得罄儒臣之奏

九重示心印之全必功先乎謹獨斯學足以達天雖
欽明之帝德祇不越乎敬焉蓋聖功實王道之
本而作君裕作師之權由是臣隣忭舞士子騰
騫飮聞緒論曲受陶甄乃溥教澤於千八百國

而宏道統於億萬斯年既備上儀重申

巽命沃瀛海兮瓊為漿沛澤宮兮膏流潤雷動兮歡
迎嵩呼兮齊進迴璿車兮柳拂清塵轉和鑾兮
花縈綵紉益嘉惠於遐荒更闢門而選俊喜曠
典之親逢知敷天之同慶如震疇而發聾聆金
聲與玉振慙弁陋之愚衷贊

高深而莫竟竊握管以揮毫獻蕪詞而紀盛

聖主臨雍禮成頌

謹序

陳兆崙

臣聞引年肇自虞庠視學詳於姬錄文物聲容
散見詩禮遐哉尚矣厥後令辟迭興時循掌故
園橋觀聽以為美談顧或質異徇齊文慙述作
業業之旨罕窺郁郁之觀未逮洪惟我

皇上所其無逸煥乎有文集羣聖之成貫萬殊於一
言成綸綍動合典謨是我

皇之明德

先師其馨享之重以揚風圻雅剔穴搜巖家有

賜書戶多挾冊天下之士于于而來

闕下者蓋以萬數是我

皇之道化

先師其式憑之乃者三雍丕煥六館濟蹕綺族清
漪雲連黃屋猶復絳以金榜麗以

龍文出入如臨左右如在是我

皇之崇禮

先師其降鑒之由斯以談道合者神謀德均者禮

肅非徒以崇侈虛文勉遵故典而已也乾隆三年三月爰有事於太學時則端策諏辰大昕暨列儒寮展采禮臣相儀鐘鏞振於序籥翟陳於階

皇上於是式灌獻之節儼緝熙之容

聖敬日躋

道心淵映禮成

御彞倫堂羣士以陳謨按六經而校德探奧寔揭

神筌規勲華示簡易盖罔不拜手稽首欽承我
后之明訓易曰觀乎人文以化成天下詎不信歟
臣
備員侍從謹獻頌一篇以比於擊壤之體詞曰
於鑠

皇清丕顯文德我

皇繼之式承前烈百辟其型四方順則倬哉

先聖萬世所宗人倫之至俎豆斯崇翼翼宮廟載
見辟雍維此辟雍萬國之視方春和時我

皇莅止端服正弁鉶羹列簋列簋既奠典禮攸行爵
具三獻詩歌六成神之格思終和且平乃命仍
筵乃設玉玷疑丞奉書侍言懷輦期門受讀虎
賁脫劍堂階之側羣策雍雍逖矣四裔咸從於
公懷仁仰化蘊智欽風奕奕諸生實閑且敬青
槐如烟圓海若鏡魚明作覩

一人有慶慶譽

一人瓊琚玉珩思皇多士

皇國克生

帝曰俞哉勉爾令名方

帝之來都莊雲動迨

帝之還馮路颺送言觀

國光萃此有衆古云文章揚厲豐美詩歌於論書
載喜起以臣之愚未暢厥旨於萬斯年敬告惇史
乾隆五十年

皇帝舉行三大禮恭賦

謹序

彭元瑞

臣 元瑞言右臣伏以

皇帝陛下大德久道輯釐脩福酌三古之令典肇萬
世之上儀迺旃蒙已盛王正丙辰

詔開千叟宴越月丁亥以辟雍告成釋奠

講學越月辛亥

親耕于耜田是歲也

福紀協五

皇春登三一時而三大禮行焉人歡訢洽天瑞景從

自軒轅甲子以來四千四百八十二年未之有
也臣嘗讀唐杜甫所為三大禮賦古與瑰博史
家艷之顧其所陳朝獻太清宮事既不典若郊
廟則王者所宜歲有事也又多述武德貞觀之
烈舊儀故實所傳於當世無稱焉以甫之才仕
不遇時德薄化淺不足以發其文臣生
邛隆之世事

古稀之君親見一時行三大禮幸趨蹌執事其間思

欲有所敷陳而殖庠詞陋萬萬不及甫良用惡
縮然而訂古叛今昭

德紀實文雖不逮事則何唐之足云蹈泳奮汁遂忘
其愚敬作三大禮賦以

獻

千叟宴賦

古稀天子維凝承

吳絳佑錫

純嘏俾單厚燾九有以元氣躋八方於仁壽少有所
長老有所養下逮螭翹跂息咸若成衆將乎清
寧之寓娛乎懷葛以上通邑大都遐陬僻溼方
瞳碧睂鮐背犂眉之人徵年於冥靈大椿觀太
平而倚杖於是

皇帝御極五十年矣珠囊開萬寶紀週旬三微肇作
四序履端驕

龍樓之鸞誥揭

鳳闕之雞竿

嘉子薄海咸普

湛恩先期

詔下將以正月日吉舉千叟之宴焉時維丙丁見弧
角亢同壽莫奮茁以六葉草勾萌手三秀先七
人與八穀叶辰良於珠宿闕外初鉦壺中遲漏
入葭律以東風迴黍谷於晴晝引雲路於

東華啟

天闔於

乾清春臺四達泰階三平

紫微帝座都福之庭午陞瓊鉤辰居玉繩設清聲於
闌內懸韶樂於南榮鑪烟芬其裊裊黃繖植而亭
亭法天道之下濟位

黼座於前楹填庭溢闕軒舞鼗鼓奔走偕來以燕譽
處問其年則算週甲子生首丙午四豆五豆六
豆之倫杖國杖學杖朝之侶昇平人瑞盈百疇

五蓋其衆三千人綜之得二十一萬有奇而莫窮其數也其人則

天潢之派若木之英四相文昌三台平衡二陝之伯
九寺之卿御史為中執法郎官應乎列星貂蟬
兜鍪之帥羽林飲飛之營江湖魏闕之心子孫
萬石之號士誦農耕商遷工巧北漠賓客西瀛
宿衛朝使涓水之東土自桃關之外服從土宜
人襲冠帶蟠地際天日蝕月竈以為安美之勝

游錢佺之嘉會

帝乃蒞手丹宸鸞扇開鯨鐘啟有位咸膝席元臣奉
觴鞠脰前致詞曰願以臣隸三千人積筭合上
一人壽鱗集鳧慕九拜即席康衢置尊舉觴行災出
堯厨之萐莆寫舜榼之璫液雕菰之香雲母之
白篆三品之精鏤賁三服之珍帛江斫宣毫楮
生子墨如意開年荷囊佩夕智珠百八靈壽九
節黃封重叠雕盤收積

天上携歸人間

賜得其有九袞崇年一品高位尚齒尚爵老老貴貴
宣之席前

手以觴賜需蒲柳以吉雲漉桑榆以寶露宴以示慈
禮不愆度

天題唱羣什賡金石諧婉颯颯乎和聲

天子乃懌乎怡愉動乎淵漠

謂是舉也伊述匪作溯盛典於壬寅六十年其如昨

昔依膝於

含飴今

厯心於調幕

三征朔漠維時其剝削之

六巡吳越維時其荒度之

聖有惠心今普蠲者五度

聖有典學今觀文者四閣益五十年日慎一日朝乾夕

惕若宣

重光衍五代

繼序皇

前猷廓至今而可與宗族懿親子孫臣庶同舉斯爵也
且夫繼志述事至孝也儲祉襲祥百順也引年
隆齒大道也其斯以為養老歟彼夫唐宴洛陽
之離都漢饗南陽之故宅濫或登之版授隘僅
及乎宮側班鄭所述服杜所詮人殘義鑿如聚
訟然始

著說以息衆糾再

抒記以定一尊數典乎鄒邑徵實乎岐山斟酌六籍
折衷羣言又如羅鳩執爵之供袒割醬饋之恭深元
縞燕之容掇拾糟粕各各異同豈足語今之養
老矧其支離傳會於辟雍也哉

辟雍

講學賦

辟雍天子之學也自放勳以上未之前聞虞有

西膠之庠夏有兩序之造殷有瞽宗之文亦越
周穆考圉辟雍以靈沼武王考卜自豐宅鎬備
四學之制以為有天下之號王制云天子曰辟
雍諸侯曰類宮如樂之宮懸軒懸圭之前詎後
直其示別蓋可從焉後儒之說紛紛競起取義
則辟者明而雍者和象形則辟壁圓而雍壅水
九室十二室四窓八窓太廟清廟世室明堂名
異地同大射大饗大祀行其中以神道之清靜

天子之尊崇混神人而無異宮母乃迂且侗乎

我

國家德教熙洽文治駿鴻

皇帝以上聖之資

身為之律

道積厥躬

詩超雅頌

大軼典誥萃四庫以右文廣諸科以烝髦蔭黃瓦於

華懷榮綠槐之嘉陰

頒周範之十器瞻車服於

孔林立學崑濛建廟興桓靡不崇飭修舉詎首善
之地而辟雍顧自元中統以來五百年闕焉未
完也迺

命禮官俾相度

召司空庀將作伐石穹嵒聚材巨壑任榱桷以梁棟
區椅桐以采楠施以斧藻彰以丹雘圓蓋穹聳

象天行也鱗渠之而環重瀛也瓊陛對出四門
闕也朱牖洞敞四目明也井可用汲左右逢原
也風行其上觀水觀其濶也

帝位手中

聖杏壇也

奎文黼宸

聖人之言也翼以六堂士誦強也其北則高堂豁閭
連楹八柱席間函丈講肄所聚

璇榜揭日

福疇攸叙其南則寶坊翹瞻屹峙若闕教澤以園學
海以節植豐碑之隆隆蔭層亭之業業維

皇極之敷訓紀肇造之歲月實主名賓循僉守轍
爾多士進德修業大哉

聖人備德位時治觀成而勿亟事有待而非遲復古
者歲泥古者蚩推而言之井田不可以治地封
建不可以司牧三年里選不可以得士五品不

遜不可以善俗決不可治水車不可教戰泉府
不可易園而刀賦稅不可易粟而絹矧我

朝大經大法

祖述憲章將萬萬年守之而不愆不忘者哉經營不日

迺二月上丁舉

釋奠之儀以落其成萬仞宮牆六拜殿墀奠爵薦
幣屬屬祗祗合先聖之揆雖

天子必有師

德馨誠感

神之格思禮既成乃

臨辟雍

王者視學自北門入

天度穆清如雲如日升者鵷翼仰者鵠立班者鴻漸

聽者麋集黉席之老百五橋門之士三千命公

圭搢博士襍聯四氏五子東野西姬演疇舊封

暨高句驪靡不拭目傾耳虔悚以俟儒宰陳書

祭酒執經捧撮土以附嶽掬涓流以益溟丕著
御論誕告汝自西自東自南自北維天順至誠之動
惟聖立人倫之極仁敬慈孝以達於信交潛見
躍飛必本乎乾惕天垂其則聖合其德賢入其
域人荷其責百姓與能君子不息高矣美矣茂
矣大矣

聖之徹上下貫精一而自道所得也于是驚者橋舌
悅者服膺道氣之所布護元化之所醞蒸感以

符節之合動以志氣之壹

誠之至者如神天垂象而見吉始散稷於觀旂乍成
珪於拜席香升而雲同律和而風習釀三冬之
和渥一日之澤宵雅昌穀於禹甸春秋紀瑞於
周尺化為雨之時被為風之春積為道岸之登
融為

聖涯之淵士尚其禮耕義種而講學以耨占者曰天
道地寶而人情為田

親耕耤田賦

有預宴老農被黃襪扶

賜杖造乎成均髦士曰側聞

古稀天子將舉典循理順東作以勸穡

躬

帝耜乎千畝有諸曰有之有司既戒事矣京尹既宿肄

矣三月吉亥天倉辰叶先日則胃宿合朔翌旦

則上已靈節積雪融暎天田含津協風告夙覲

土發新肅勾陳以

屆青郊之南歌載芟以享

先農之神

三推重典一墾輕塵龍犁行直青箱種勻從耕脩手

五九終畝藉乎庶人此我

朝劭農之舊儀吾

皇勸相之先務自辛丑迄乎壬寅

躬行者二十一度矣叟何若驚若疑若有餘慕也老

農曰蒙有說焉願罄其愚織當問婢耕當問奴
古者二十授田六十歸田一夫百畝尚限以年
是以有侯彊侯以侯亞侯旅所以職服勞而代
作苦也五十不從力役頒白不負戴諒貴賤之
有殊匪筋力之異態今

皇帝春秋高七十有五矣雖

莊敬曰強

健行不息而往復於繡錯綺分之間張弛乎紺轅黛

耜之側其母乃

聖躬勞而勤

帝力手且耜田之法見諸戴記詳於國語代相沿而
禮相踵不皆上壽之主以蒙所聞六帝者漢武
征和鉅定是卜梁宗普通望臺以築唐開元之
載廿三宋紹興之歲十六至元肇乎七年洪武
訖乎六旬鴻儀寥濶盛事因循皆古稀未登耄
期先倦孰若今者

萬壽上臺萊之祝六穀猶穰穰之獻自周武始耜以
來史冊之所未見也髦士曰叟獨不聞

聖主之勤農事乎何獨耜田哉

籌海

觀河災蠲歉借省歲暮之穀數計日中之米價演耕
儀於豐澤興弄田於泉宗預望雨而龍見先卜

雪於柏冬

問一天之雲氣徹五夜之宵鐘遠驛詢於方伯近

蹕省乎旬封喜伊犁二麥之熟慶山田千畝之豐圖
早題於貴織

詩多寓乎憫農稔占宮樹之濕霖候山桃之紅民但
喜乎甌溢

帝先憂乎黼供兆姓曰衣我食我一心以風人雨人
豈僅手足之為烈而自謂便民也大哉

時憲者

天廣運者

聖日月旋而光明春秋序而順正志為氣之帥心為
形之君不測在誠不匱在勤我

聖人游神乎冲澹

宅心手穆清以

劫毖為調燮以

宵旰為康寧

萬幾兢業八方在宥動手自然不假乎堯步舜趨湯

馳禹驟用致貞一純固與

天同

壽又何艱於一青耒之秉一洪厯之授此供盛勤已
班固頌而難詳固本致孝潘岳賦之未就也遂
告大有協農祥既富方穀民樂且康青史登三
皇之牒黃髮上

萬年之觴斯真

皇風之隆軌

壽世之嘉祥也哉

說雍

吳省欽

乾隆五十年春二月丁亥

皇帝飭法從服禮服祇事於

文廟六奏備作神人豫和遂

詣彛倫堂更衣服實乾隆三年

臨講處也當三十四年

上釋奠太學言臣以建置辟雍請格部議未舉四十

七年

上臨度面勢

命給少府錢率作興事鑿池壁圓中麗穹宇有門有
橋古槐後蔭役歲上冬禮簪茲日越王公百執
事聖賢裔姓逮六館生徒軒轅翔濟迺序於

辟雍之南候

駕臨講敬止健行揆符合一稽唐虞三代而下人主
歷年七十上者紀年至五十者上下千百年間
世一遇至如

五世一廷愉愉緝緝昔

孔子集羣聖之成為生民未有

皇帝以帝王未有之聖賢集帝王未有之福之成惟
是建國君民教學首善古辟雍之制與夫臨雍
講學之典有是名當有是實即一端而我

皇上紀綱法度禮樂政刑之全胥準此已以臣弇味

利觀

國光不揆不文謹撰說雍一篇拜手稽首而獻曰

古無辟雍之名至周始置王制天子曰辟廱廱
通作雍辟雍者天子之學於虞上庠於夏東序
於殷右學即瞽宗周立四代之學合太學為五
學太學在東東膠又在辟雍之東辟雍環水天
子承師問道行禮樂宣德化多就此行之其餘
國子之學學禮就瞽宗學書就上庠學舞干戈
羽籥就東序學樂德樂舞樂語就成均此以知
太學非清廟成均非辟雍韓詩說辟者辟取有

德盖讀若闡鄭康成禮注以辟訓明以廡訓和
使天下之人皆明達和諧其箋靈臺詩亦言在
辟廡中感中和之氣而大戴禮曰明堂外水曰
辟廡是妄以明堂辟廡為一蔡邕月令論曰取
其宗廟之清貌則曰清廟取其正室之貌則曰
太廟取其堂則曰明堂取其四門之學則曰太
學取其周水圓如璧則曰辟廡是妄以廟學明
堂辟廡為一潁子容春秋釋例曰肅然清靜謂

之清廟行禘祫序昭穆謂之太廟告朔行政謂之明堂行饗射養國老謂之辟廱占雲物望氛祥謂之靈臺其四門之學謂之太學總謂之宮是妄以廟學明堂辟廱靈臺為一魯詩說文王作靈臺以齊七政奏辟雍是妄以淮南子文王有辟雍之樂指辟雍為樂名陋儒皆信之皆從而述之要之殷太學在郊故文王辟廱在郊周太學在國故武王辟廱在國在郊故曰振鷺于

飛于彼西雛在國故曰鎬京辟靡自西自東自
南自北無思不服靡或作雛朱子曰雛澤也說
文無雍有靡从尸讀若儼象對刺高屋之形四
方有水曰邕故从凵毛傳曰辟靡水旋邱如璧
以節觀者孔穎達疏曰璧體圓而內有孔此水
亦圓而內有地猶如璧然此水內之地未必高
於水外正謂水下地高故以邱言以水繞邱所
以節約觀者臣竊以以水繞邱則必以邱起宮

天子有辟廱諸侯有泮宮泮宮半於天子之宮也泮亦作潏潏池象璜圜池象璧池之上皆當有宮西漢末治明堂辟雍光武中元立明堂辟雍靈臺三雍班固詩有辟雍湯湯之語而大戴禮固云明堂外水公玉帶所獻明堂圖亦環有水以雍訓和本融而為川之義詩來雛論語作雍意漢時靈臺亦壅水故曰三雍若雛廱皆从川以水而言當从雛以宮殿而言當从廱楊慎

引水經泮水一名雩水在靈光殿東南即魯泮宮故址泮乃水名不得以泮林為泮林豈得以泮宮為泮宮不知古天子諸侯有澤宮今府州縣衛學之廟曰泮宮宮前有池而

京師有廟有學無池

皇上君師統合議禮制度考文作

辟雍作

辟雍殿殿之制既立故其文从雍不从廡池圓象

德圓

殿方象行方規矩之象昭焉天地之撰合焉良以
釋奠之典數舉

臨雍之典載舉而彛倫之堂可謂之學不可謂之辟
雍今有橋有門有池與詩注王廡水之外圓如
璧者合有

殿與記所稱澤宮者合

講闡經訓丕變觀聽與白虎通所稱行禮樂宣德化

者合先舉

釋奠與記所稱天子視學祭先師先聖遂適東序
者合詩曰於論鼓鐘於樂辟廡大昕鼓徵臣庶
感化彼綴文牽義之徒或曰辟之為言積也積
天下之道德雍之為言壅也壅天下之殘賊或
曰辟者法之所自出本之以為禮廡者和之所
自生本之以為樂附會穿鑿本義愈晦惟禮統
謂辟廡內如覆外如偃盤禮書謂辟雍園而函

方陰陽之義與圓璧之義不背然言辟雍不言
辟雍有殿我

皇上因心作則所傳者唐虞三代聖人之心所行者
唐虞三代聖人之政所議者唐虞三代聖人之
禮創建非常洋洋堂堂懋敷

聲教仁敬孝慈信倫之所以叙也天行健君子以自
強不息德之所以純亦不已也雖雖手

議道自己隆禮由禮不特視漢唐陋儒專以辟雍為

習射養老處者意量固已霄壤即文王在郊之
辟靡武王在國之辟靡其淺深廣隘夫豈可同
日語哉是故元明以來數百年未舉之典至

皇上而興實則唐虞三代以來盡美未盡善之制至
皇上臨雍講學將事豫備作

辟雍即旋壁之邱作

辟雍殿而天下萬世始以知彞倫堂為國學太學
辟雍殿為

天子之學殿取諸广故詩禮並从靡漢書从雍作說

雍

應制附

明

駕幸太學詩

吳溥

九重傳詔幸成均
王氣浮空淑景新
寶曆萬年開至治
文風千古復真淳
聿觀瑞慶來當寧
肇建基圖啟後人
日表文章明衮繡
雲間聲樂合韶鈞
西周在鎬寧須數
東漢臨雍豈足倫
寵錫自天春浩蕩
穹碑插地碧嶙峋
來遊璧水登髦

士紀載詞垣屬史臣仰祝聖明千萬壽普天率

土載皇仁

大翰
類選

辟雍六章

李夢陽

天子至止于彼辟雍和鸞央央其來雍雍象輅
金衡有蒼其龍光于

聖廟是依是崇

吉日維申脩我元祀皇祝設樂鏞鼓萬舞有筐
有篚以享以祀羣執肅肅秉德弗渝

誰其觀者三氏孫子其冠我
我來忻來止翩彼鳳鳥集於東林
繹其觀者其瀾如雲

自門徂基辟嚴若思青衿濟濟以辟
以師爰命祭酒司業拜手訏哉嘉謀
作民元后

帝若曰都大言式宏匪道何程匪猷
曷承載弼元理維協乃有衆拜稽首
天子萬壽

旗旒旆旆淵淵代鼓皇發辟雍用惠
下土自天降休豐年穰穰藹藹王多
吉人四國用康

空同集

駕幸太學恭述

王穉登

璧水鈞天樂
橋門鹵簿車
秋風清道早
朝雨灑塵疎
檢禮惟行菜
談經亦墜魚
不知稽古士
獻

納更何如

列朝詩集

臨雍賦

陳經邦

維聖皇之御鴻寶兮
邁禮樂之昌期
陋叔季而不踐兮
索隆世而是追
斥八九之荒談兮
慕三五之令規
歌伊教於魯頌兮
詠於樂於周詩
朗

超覽而凝思兮悟理道之所宜曰徂昔王風之
休暢兮咸首勸學與崇師迺咨羣僚乃謀故實
命春卿兮述典召星史兮練日既禮陳而辰戒
爰辟雍之是即斯時也太皞司令勾芒宣職淑
氣烟煴柔風翕習虎賁習霍以畢從兮象衛歲
凝而煥飾千官趨蹌於帝輦兮萬靈奔扈於天
蹕前元冥使灑塗兮豐隆又為之驅役六連螭
之翠蚪兮駕遺風於玉勒鳴八鸞之啁啾兮鳳

蓋高飛而翼翼龍蜿蜒其承旂兮矯若扶桑之
拂日颺畫斗之朱旛兮夾明月之玉戚皇路肅
以清夷兮儼萬乘乎天行鞫鞫麟麟兮礧礧砢
砢如風如濤兮如雷如霆忽按節以徐迴兮屈
賢闕而至止霽瑞氛於虎闌兮浮清暉夫璧水
雲興俄次兮虹旌暫委繫太學之中央兮覓覩
深而閑侈弁冕之所游翔兮章縫之所迤邐談

周

孔而吟詩書之士縝紛雜襲肩麗武接兮咸集乎
成賢之里佇矯首而望幸兮覩屬車而蹈喜皇
帝乃穆爾歛容冲然式禮瞻

素王而展謁兮曾不悵於卑已詘宸旒以對越兮
恍音容於筵几於是采五學之文崇三老之齒
饋既清於俎爵兮祝亦兼夫鯁餉爰問道而憲
言兮即授策以顧史若乃鼓鐘作筦磬鳴樹崇
牙之三組奏鈞樂之六莖羣髦露擁庶尹雲臻

或瞻依乎臨扃或論難而執經驚睿思之逸發
倏泉涌而颯生說詩者失解頤之譽談易者慚
折角之名下至鷗冠虎韜之倫遠及雕題鳥言
之長圍橋門兮動色望宮牆兮飛爽有芹兮池
之湄率青衿兮米之鼓篋兮登歌天朗兮風熙
在藻兮有魚若振翼兮軒鰭虞庠曾不足以擅
美兮周雍相彷彿其如斯迨百禮之既洽兮景
翳翳其寢移悵盤桓以返駕兮信樂只而忘罷

聞昔赤帝子之重道兮僅過魯之一祠武王起
太學與明堂兮紛文物以何為獨永平之拜老
兮千世為之豔慕而嗟咨豈若我皇之隆軌兮
直與虞周乎並馳騫小臣之承學兮何幸際此
明時哉余冠之切雲兮長余佩之陸離從六飛
之清塵兮與髦士而胥依想繫壤之謳吟兮感
棧樸而興詩遂歌之曰稽古有虞肇上庠兮鎬
京辟離亦繼昌兮疇其似之猗我皇兮儒館親

臨奕有光兮文教旁流洽四方兮數天薄海絃
誦洋洋兮天眷我皇壽考無疆兮千秋萬歲來
此堂兮作君作師其永有慶兮

賦

臨雍賦

戴洵

粵我祖宗之立國也恭天命以秉鉞順人心而
御宇思皇極之敷錫在彛倫之攸叙爰韜弓而
戢戈創辟雍而講藝稽四代之遐規酌一中而
定制於是負以崇城面以離明垣牆繚繞松柏

縱橫左殿庭之赫奕右堂舍之深閑崇

先師之嚴祀集海內之髦英人文朗王教明仁風
洽民俗成厯八聖之授受莫不躬親手幸臨蓋
所以重風化之先務示倡道於青衿逮我皇上
寶位初履承帝命之方凝懷永圖於慎始側席
以思賢每宵衣而求理考先后之令圖將次第
而修舉御文華而延訪進輔臣而咨汝僉曰教
為治本賢為國基求賢在於豫養宣教在於隆

儒維太學之穆清當神都之北隅固賢士之所
闕亦彛訓之所儲欲勸學而造士將舍此其焉
如帝曰俞哉乃降德音考禮書飭玉駕張金輿
命列缺而清道走豐隆而先驅鳳旌蔽日龍旂
拂雲副車翼翼從騎紛紛和鸞動地以蹌鏘天
香載路而網緼翠華逶迤於康衢六龍蜿蜒於
橋門遂登元堂啟丹扃禮

先聖瞻遺靈陳俎豆羞琛盛萬舞翕輶八音鏗鉤

陋太牢之簡略躬下拜之精誠蓋所以崇百王之軌範表百世之儀型若乃周旋太室釋奠既畢爰御左个於馬少息然後明養老之義講乞言之術於是進三老登五更鬻醕饋筐筐承祝哽噎於前後奉几杖於公卿親執經而問道求示我之周行斯時也考鼗鼓鏗華鐘撫清瑟吹和笙咏南山賡鹿鳴俊乂趨蹌而悅懌烝黎觀德以歡欣有一儒生歷階而升載歌聖德作為

頌聲歌曰穆穆我后臨萬邦兮勤勤圖治先綱
常兮蕩蕩文教沛遐方兮皇猷帝範超虞唐兮
又歌曰翼翼成均萃羣英兮勉我皇躬作興
兮濟濟多士邦之楨兮千秋萬歲皇心寧兮歌
誦既竟皇乃嘉德知衆志之既孚識士風之丕
應遂回鑒而入紫清開明堂以觀太平之盛

同上

臨雍賦

許國

天脩民之孔易罷君師於四方厥綏猷其維后

洽時夏而陳常於我明之十葉戢干戈而矢德
建首善自神京中四方而作則惟聖皇之嗣服
紹列祖而崇文席久道之遺化徽五典而作新
既建極以敷錫復隆樹其風聲歲初元之丁卯
月載紀乎王春皇諏吉而釋奠應天地之文明
於是宗伯草儀金吾除道青衿望幸喜色相告
天子乃服皮弁乘玉輿駕翠蚪驂文螭鏗和鸞
之鳴樹日月之旂虎賁後翼龍驤前驅都民擁

道而夾觀紛總總其承暉司成悉率六館髦士
公卿世胄遠藩侍子舉踵喁喁望風迎拜聆訾
蹕之嚴聲睇琴離之華蓋從簪笏以周旋間俎
豆而萃繇烝烝皇皇躋躋踰踰北面肅揖祇謁
素王戟門動色芹藻薦芳霓旌羽葆容與登堂五
更三老饋珍醕觴博士橫經鱗次雁行天顏穆
穆衿珮鏘鏘燦如星麗照若春暘於論鼓鐘於
樂宮牆環橋門而觀聽者以億萬計莫不舉手

加額祝皇壽以無疆猗歟休哉昔在三五重道
崇儒粵我祖宗文教緝熙喜曠典之復覲見從
官之威儀章縫增氣自上作之忭舞敬應風行
化馳始自畿甸達於四陲朱崖鐵勒負笈如歸
譬彼設的射者競趨卑漢帝與唐宗空拜老而
增舍猗璧水之湯湯照鸞旂之于邁俊又咸造
謨訓邁新僉曰休哉天子作人鉅禮告竣綸音
申勵六龍旋軫千騎迴旆遵輦道以言復垂衣

裳而致治迄四時之弦誦挹五雲之瑞氣家禮
樂而戶詩書挾烟霞而偃烽燧抽毫作賦光於
萬禩辭曰璧流繁迴環宮牆兮棧樸敷文育羣
良兮翠華蒞止師道光兮肅雍展謁黃幄張兮
聖有謨訓炳琳琅兮昭回雲漢為天章兮青衿
咸奮佩無疆兮載戢載橐肆陳常兮沛然德教

軼陶唐兮

同上

欽定國子監志卷五十八